

四
箴
雜
言

何大復
撰

中
華
書
局

四箴雜言

何大復景明仲默

四箴有序

何子曰好惡者情之發也言行者身之章也窮達者天之命也毀譽者人之施也故情之不正身之不修而不得於天不合乎人君子之病也情正矣身修矣而猶不得于天不合乎人君子何病焉是故合情而全身樂天而知人者聖人也懲乎情無違乎天持乎身無願乎人者賢人也任情以忘身希天而望人者衆人也聖人者吾不能也衆人者吾不敢也賢人者吾願學焉乃著好惡言行窮達毀譽四箴書之座右

好惡箴

好之無實謂汝曰暱惡之無實謂汝曰嫉知人而爲是汝則弗平不知人而爲是汝則弗明弗明弗平是爲枉其生

言行箴

能言而失其幾者不察其微也能行而失其要者不觀諸道也知人之敝而不以自治也者棄也行違其言者悖也以言揜行者盜也汝省其微以至其道邪亦甘於棄入於悖而流於盜邪

窮達箴

窮則益其志汝則是惡達則損其志汝則是慕雖則
汝惡窮孰汝蠲雖則汝慕達孰汝遷毋勞思眊眊惟
順汝道而俟汝天

毀譽箴

無惡而毀於汝何疚無善而譽於汝何有嗚呼汝乎
毋以毀譽而喪厥守乎

雜言十首

北方水之大者惟河故北方之水通曰河南方水之
大者惟江故南方之水通曰江濱海之水皆曰海濱
湖之水皆曰湖

古人奉德則報以珮恩返則報以環恩絕則報以玦
珮佩也環還也玦決也

鳥棲樹鴻則棲于野獸棲野猿則棲于樹

雉鷄類鴈鷺類鳬鴨類鷄鷺鷥鴨可得常食雉鴈鳬弗
可得常食也可得者在家弗可得者在野也

經亡而騷作騷亡而賦作賦亡而詩作秦無經漢無
騷唐無賦宋無詩

器虛則貯之滿則撲之木小則培之大則伐之故虛
可處滿不可處也小可處大不可處也

龍蛇之伸于霄漢者以其屈也杞柳之屈爲卮匱者

以其伸也故君子寧屈以求伸毋伸以致屈

諂似恭吝似儉諂則不恭恭則不諂吝則不儉儉則不吝

雪則霰風則霾陰則蟻霽則虹故霰則知雪霾則知風蟻則知陰虹則知霽

婦人之仁不仁匹夫之勇不勇仁者垂不滅之德施不報之恩勇者見義必爲當幾能斷

卷完

